

## Ti xroon saoxín tsíkjin

# Juan

### Ti tan tjajon kjuachón

**1** <sup>1\*</sup>Ti nkexro xráxín kjuák'e, ti nkexro kuíhini nixja, ti nkexro k'uíkoxín ikoni la ko kuákóxín itjani, mé ti nkexro nixja ti tan tsajon kjuachón. <sup>2\*</sup>Ti nkexro a, mé kjuák'e ntihi chjasintajni, la kaíni k'uíkoni, la xíkaha chrónkani nkexrín itjen; la kjaxin chenkaíni ti jahara nkexrín itjen ti kjuachón nkochríxín, k'uékjak'eko It'eni Díos, andá ikui chjasintajni k'uíkoni. <sup>3</sup>Jeheni chrónkaxíni ti nkehe k'uíkoni la ko ti nkehe kuíhini, kixin kjaxinra chrókónohara la nkoqoa chrókuinkachónkira ch'an éxi jeheni nkoqoa tjejóni tinkáchónkini It'eni Díos la ko ti Xjeen ch'an, Jesucristo. <sup>4</sup>Mé xíkaha ikjini tíhi, kixin chrókujuintaxín chrókócháhara la ko chrókóchéheni.

### Díos mé ti xrohi

<sup>5</sup>Ti tan i mé kjuako Ìnchéni Jesucristo kuíhini, andá ijie mé chrónkani kixin tsihínra kixin Díos

mé ti xrohi, la kohya ninkehó sítie ti itjen ch'an. <sup>6</sup>Ti tsondáchroni kixin tinkáchónkini Díos, andá naxa ixrini ti sítie, la ch'iani kixin nchexiteyáhyani ti nkehe chaxín jína. <sup>7</sup>Andá ti xrit'ejóni ti t'inkaséña kixin Díos itjen ti t'inkaséña, la xíkaha nkoqoa tjejóni tinkáchónkini ch'an, la ti ijnié Xjeen ch'an Jesucristo mé tsjixín kaín ti ijie chóntani.

<sup>8</sup>Ti tsondáchroni kixin chóntahyani ninkehó ijie, la jehóni ch'iyehé aséni, la chóntahyani ti nkehe chaxín. <sup>9</sup>Andá ti tsondáchroni kixin chóntani ijie, la Díos imá jína la ts'óxika ch'an kaín ti ijíeni la ko sinchetjóá ch'an ti jeheni. <sup>10</sup>Andá ti tsondáchroni kixin chóntahyani ninkehó ijie, la éxi chróndáchroni kixin Díos la imá ch'ia, la chaxínhña chóntani ti itan kuénté ch'an.

### Cristo tsonixjayákohen ti jeheni

**2** <sup>1</sup>Xjeeni, ikjian ti xroon i, ts'ayéhéra kixin chrókjuásinhñara ijie. Andá

ti nkojín nkexro kjuasin ijie la chóntani ijnko nkexro tsonixjayákohen ti jeheni nkayakon Díos, tíha mé Jesucristo, ti nkexro chaxín jína la ko ndoá. <sup>2</sup>Jesucristo mé k'uenyákohen ch'an ti jeheni kixin ijnié ch'an mé tsjixín ti ijieni; la jehya jehó ti ijieni. Náhí. Kjaxin ijie kaín ti chojni síin chjasintajni.

<sup>3</sup>Ti tsitekaoni ti nkehe k'uetōan Díos, ndá chaxín tsonoheni kixin chóxini ti jehe ch'an. <sup>4</sup>Andá ti nkojín nkexro tsondáchro: “Janhan la choxián Díos”, andá ti titekakhonña ti nkehe k'uetōan Díos, la mé ch'ia la ko noehña ti nkehe chaxín. <sup>5</sup>Andá ti nkexro nchexiteyá ti nkehe k'uetōan Díos la chaxín tjeuhe Díos; mé xíkaha noheni kixin chaxín nkokoq tjejókoni ch'an. <sup>6</sup>Ti nkexro ndáchro kixin chaxín tinkáchónki Díos la chrókjuák'e éxi kjuák'e Jesucristo.

#### Ti nkehe nixin k'uetōan Díos

<sup>7</sup>\*Kíchóni, ti nkehe ikjian, la jehya ijnko nkehe nixin. Náhí. Tíhi mé ti itan kuihínra ndesi kjuankíxixínra kuinkachónkira Ìnchéni. Ti nkehe k'uetōan Díos i, la ó xráxín itjen, mé ti nkehe ó xráxín kuihínra. <sup>8</sup>Kjánchó ti nkehe ikjian la éxi ijnko nkehe nixin. Tíhi la chaxín kjuakoxin Cristo, la ko kjaxinra tjákoxinra tíhi kixin ti sítie la

ó tinkák'atsínka, kixin ijie la ti xrohi chaxín mé t'inkaséñaxín.

<sup>9</sup>Ti nkexro ndáchro kixin ixri ti t'inkaséña, ndá naxa nínkakohen kícho, la naxa ixri ti sítie. <sup>10</sup>Ti nkexro tjeuhe kícho mé itjen ti t'inkaséña, la í kohya nkehe chrókjuasixín ijie. <sup>11</sup>Andá ti nkexro nínkakohen kícho mé naxa ixri ti sítie, la noehña nketi sátsji kixin ti sítie la tjajonhña kjuachaxin ts'ikon.

<sup>12</sup>Jahara chájan, kjinhara ti xroon i kixin tsonohara kixin Díos la ó k'óxika ti ijíara kixin Ìnchéni Jesucristo k'uenyákohen ti jeheni. <sup>13</sup>Jahara it'é xjan, kjinhara ti xroon i kixin jahara ó choxínra ti nkexro itjen ti xránkíxixín. Kjinhara tíhi, jahara ntasoíra, kixin kaín asánra kjuachehéra ti Jínahña la í kjuachahya k'uetuahanra.

Ikjian ti xroon i ts'ayéhéra, jahara chájan, kixin choxínra It'eni Díos. <sup>14</sup>Ikjian ti xroon i tsihínra jahara it'é xjan, kixin ó choxínra ti nkexro xráxín k'uékjak'e ti naxa k'ónahña chjasintajni. Ikjian ti xroon i tsihínra jahara naxa ntasoara kixin naxa fuertera la ko titekáonra ti itén Díos, la ko kaín asánra ó kjuachara, kjuinchesiteyéhyara ti Jínahña.

<sup>15</sup>Chrotjuehyara ti chjasintajni la ko ti nkehe chóna. Ti nkojín nkexro naxa tjinkaon ti nkehe síin chjasintajni, la naxa

chaxínhña tjuêhe sin It'éni Díos. <sup>16</sup> Kixin ninkehó ti nkehe chroxí chjasintajni la kuixínhña ti itjen Díos. Ti nkehe kuènté chjasintajni mé tíhi; ti nkehe jínahña tjenkayáxin chojni, ti tjak'e chojni asén ti nkehe t'ikon, la ko ti kjuahnke chóna chojni kixin chóna itsjé nkehe tjete. <sup>17</sup> Ti chjasintajni la tsinkákjeje la ko ti nkehe jínahña chroxí; andá ti nkexro nchexiteyá ti nkehe tjinkaon Díos mé tsjak'e nkochrín.

**Ti chojni xrich'ia ndáchro kixin jehe mé Cristo**

<sup>18</sup> Xjeeni, ó kuichjina ti ñao tsjixixín, la ó kuihínra kixin itsi ijnko chojni jínahña tsondáchro kixin jehe mé ti Cristo. Andá ijie la ó sítinkáki nchónhña ti chojni nínkakohen Cristo, mé xikaha noexíni kixin ó kuichjina ti ñao tsjixixín. <sup>19</sup> Jehe sin mé k'uaxrjekjaxín sin ti jeheni; la chaxínhña kuinkáchónki sin Ìnchéni. Kixin ti chrókóchaxín chrókuinkáchónki sin ti nkexro tinkáchónkini la kjá chrók'uaxrjekjanxínhña sin ti jeheni, la ñaxa chrók'uejókoni sin nkokqa. Andá xikaha kjuakoxin sin kixin jehe sin la jehya chojni chaxín tinkáchónki Ìnchéni.

<sup>20</sup> Andá jahara, la Cristo tjáhara ti Nchakuén ch'an, la kaínra nohara ti nkehe chaxín jína. <sup>21</sup> Jehya ikjian ti xroon i tshínra kixin noahñara. Náhi, jahara la ó

nohara ti nkehe chaxín la nohara kixin nijnko kjuach'ia tixínhña ti nkehe chaxín jína.

<sup>22</sup> ¿Xá nkexro ti ch'ia? ¿Xá jehya ti nkexro titekakhña kixin Jesús mé Cristo ní? Mé tíha la ti nkexro nínkakohen Cristo, ti nkexro titekakuenhña It'éni Díos la ko ti Xjeen. <sup>23</sup> Kaín ti nkexro titekakhña ti Xjeen Díos la chónahya sin It'éni Díos, andá ti nkexro chronka kixin tíha mé chaxín Xjeen Díos la kjaxin chóna sin It'éni Díos.

<sup>24</sup> Méxra kaín asánra chrókuitekáonra ti itan kuihínra ti xránkixixín, la chrók'uitjáñahñara tíha nkochrín. Kixin ti kaín asánra titekáonra ti nkehe kuihínra la chaxín nkokqa tjejoqara ti Xjeen Díos la ko ti It'é ch'an.

<sup>25</sup> Kixin Ìnchéni Jesucristo ndáchro kixin tsjajon ti kjuachón nkochrín ts'áyéheni.

<sup>26</sup> Mé xikaha ikjian ti xroon i kixin chrókónohara kuènté ti sin tjenkayáxin sit'ayahara. <sup>27</sup> Andá jahara la ó chontara ti Nchakuén Díos kjuajon Jesucristo, ndá xikaha í ticháxinhña ijnko chojni chrókjuákohara, kixin ti Nchakuén Díos mé tsjakohara kaín nkehe, la ko tíha tjako ti nkehe chaxín jína la jehya kjuach'ia. Méxra titoéhyara Cristo t'ejokqara ch'an nkokqa éxi tjako ti Nchakuén ch'an.

<sup>28</sup> Andá ijie, xjeeni, titoéhyara Ìnchéni, t'ejokqara ch'an nkokqa, kixin ti ó itsi

ch'an la chrókósuèhyani chrókóchjineheni ch'an kixin chaxín chóxini ch'an. <sup>29</sup>Ti nohara kixin Jesucristo mé ijnko nkexro imá jína, la xíkaha chrókónohara kixin kaín ti nkexro nchexiteyá ti nkehe jína mé xjeen Díos tíha.

### Ti sin xjeen Díos

**3** <sup>1</sup>\*Tsjehéra kixin It'éni Díos la imá tjehe ti jeheni, la kjuajon ch'an kjuachaxin its'ini xjeen ch'an, la chaxín tíha. La xíkaha ti chojni chjasintajni la chónhña ti jeheni kixin naxa chónhña sin Díos. <sup>2</sup>Mé xíkaha kíchóni, ó k'ónani xjeen Díos, kjánchó naxa noehñani nkexrín ts'ejóni ti ñao tsjixixín. Kjánchó noheni kixin ti ó itsi Ìnchéni Jesucristo la tsoyóheni ti jehe ch'an, kixin ti ñao a, la ts'ikoni nkexrín itjen ch'an. <sup>3</sup>Kaín ti nkexro tjejóchóhen itsi Ìnchéni la chaxín chrókuítóhe sin ti ijje sin kixin chrókótjóa sin éxi tjuáxin Ìnchéni.

<sup>4</sup>Kaín ti nkexro tjasin ijje la nchexiteyáhya ti nkehe k'uetoan Díos, kixin ti ijje la ti sinchexiteyáhyani ti nkehe k'uetoan ch'an. <sup>5</sup>\*Kjánchó jahara ó nohara kixin Jesucristo la ikui kixin tsjatsiin ti ijjeeni, kixin jehe ch'an la chóntahya ch'an ninkehó ijje. <sup>6</sup>Méxra kaín ti nkexro tjejóko Díos la í tjasinhña sin ijje; andá kaín ti nkexro naxa

tjasin ijje la chónhña sin Díos la ko t'ikonhña sin ch'an. <sup>7</sup>Méxra xjeeni, chrókuítóehyara kixin ninkexró chrókjuít'ayahara; kixin ti nkexro tjakoxin ti nkehe jína la chojni jína tíha, kixin Ìnchéni la jína ch'an.

<sup>8</sup>Andá ti nkexro tjasin ijje la mé kuènté ti Jínahña; kixin ti Jínahña la xráxin tjasin ijje ndesi xránkíxixín chjasintajni. Méxra ti Xjeen Díos la ikui kixin sinchek'itjáña kaín ti ixra kuènté ti Jínahña.

<sup>9</sup>Nijnko ti nkexro k'óna xjeen Díos naxa tjasin ijje, kixin ó chóna sin ti kjuachón kjuajon Díos; la í xrokjuahya tsjasin sin ijje kixin jehe sin la ó xjeen Díos. <sup>10</sup>La xíkaha tjatsoanxíni nkexro ti xjeen Díos la ko nkexro ti xjeen ti Jínahña, kixin ti nkexro nchexiteyáhya ti nkehe jína la ko tjehyá kicho mé jehya xjeen Díos tíha.

### Chrotjueheni kíchóni

<sup>11</sup>\*Tíhi ti itan kuihñra ndesi xránkíxixín, kixin nkojnkonni la chrótjueheni kíchóni.

<sup>12</sup>\*Chrok'ónahñani éxi Caín, kixin jehe ch'an la kuènté ti Jínahña, kixin k'óná ch'an ti kicho ch'an, Abel. Ndá, ¿nkekuènté kixin k'óná ch'an? Kixin ti nkehe kjuích'e Caín la jínahña, andá kaín ti nkehe kjuích'e Abel, la nkehe jína tíha.

<sup>13</sup>Kíchóni, chrókóxakuanhñara ti ó tsonínkakohanra ti

chojni chjasintajni. <sup>14</sup>\*Jeheni la ó noheni kixin ó kjuixin k'uatsínkaxíni ti kjuach'én, la ó chóntani kjuachón, la noexíni tíha kixin ó tjuèhèni kíchóni. Andá ti nkexro tjuèhya kícho la naxa tjejó éxi tsík'en xíkaha. <sup>15</sup>Kaín ti nkexro nínkakohen kícho la mé éxi ijnko chojni tsíkjàya, ndá jahara ó nohara kixin ti chojni tjàya la xrokjuahya tsochónta ti kjuachón nkochrín. <sup>16</sup>Andá jeheni ó noheni nkexrín chrótjuèhèni kíchóni, kixin Ìnchéni Jesucristo la kjuakoxín tíha, kjuajon ch'an asén ch'an k'uenyákohen ch'an ti jeheni; la xíkaha kjaxini ticháxin tsotjuèhèni kíchóni kjónté chrók'uenyákoheni ti jehe sin. <sup>17</sup>Ti ijnko nkexro chónta itsjé nkehe, ndá t'ikon kixin ijnko nkexro chóntahya ninkehó, la ndá tsikondehña la, ¿nkexrín chróndáchro kixin tjuèhe Díos kaín asén? <sup>18</sup>Xjeeni, jehya ir'uani ó chróndáchro kixin tjuèhèni kíchóni ndá chaxínhña. Náhí. Ticháxin chrókjuakoxíni kixin chaxín jína tjuèhèni sin la ko tsjinkítsani sin.

<sup>19</sup>Mé xíkaha tsoñoexíni kixin chaxín tinkáchónkini Díos, la ko tónoheni kixin chaxín tjejókoni ch'an. <sup>20</sup>Andá ti aséni naxa tjanchia ijje, la noheni kixin Díos la antsí chónta kjuachaxin ke ti aséni kixin jehe ch'an la nohe ch'an kaín nkehe. <sup>21</sup>Mé xíkaha

kíchóni, ti aséni tjanchahya ijje, la chaxín jína tsochjinani ti itjen Díos, <sup>22</sup>la Díos tsjajon kaín ti nkehe tjancheheni, kixin nchexiteyáni ti nkehe k'uetóan ch'an la ko tjejóch'eni ti nkehe tóxríhín ch'an. <sup>23</sup>\*Ndá tíhi ti nkehe k'uetóan ch'an: kixin chrókuitekaoni ti Xjeen ch'an Jesucristo, la ko chrótjuèhèni kíchóni éxi kjuako ch'an.

<sup>24</sup>Ti nkexro nchexiteyá ti nkehe k'uetóan Díos mé tjejóko sin ch'an, la ko jehe ch'an tjejóko ch'an ti jehe sin. Mé xíkaha noheni kixin tjejókoni ch'an kixin ti Nchakuén ch'an k'uáyéhèni.

#### Ti Nchakuén Díos la ko ti nkexro nínkakohen Cristo

**4** <sup>1</sup>Kíchóni, chrókuitekákuenhñara kaín ti nkexro ndáchro kixin chaxín chónta ti Nchakuén Díos. Náhí. Ícha jína chrótsjehéra ti nkehe ich'e sin ndá chrókónohara á chaxín chónta sin ti Nchakuén Díos o náhí. Kixin ti chjasintajni la síin itsjé chojni xrich'ia, ndáchro kixin nixja sin itén Díos. <sup>2</sup>Mé xíkahi chrókónoaxinra kixin á chaxín chónta sin Nchakuén Díos: kaín ti nkexro tsondáchro kixin Jesucristo mé chaxín ikui k'óna éxi ijnko chojni chjasintajni, mé tíha la chaxín chónta Nchakuén Díos. <sup>3</sup>Andá ti nkexro tsondáchro

kixin chaxínhña ikui Jesús, la ti nkexro a la chóntahya ti Nchakuén Díos. La jehe sin mé chónta sin nchakuén jínahña, ti nkexro nínkakohen Cristo. Jahara ó kuihínra kixin itsi ti nchakuén jínahña, andá ijie ó ixri ntihi chjasintajni.

<sup>4</sup>Xjeeni, jahara la ó xjeen Díos, la ó kjuachehéra ti nkexro xrich'ia, kixin ti Nchakuén Díos chóntani la antsí chónta kjuachaxin ke ti Jínahña t'etōan ntihi chjasintajni. <sup>5</sup>Jehe sin la chojni tjasin ijie, méxra nixja sin ti nkehe kuènté chjasintajni. La kaín ti chojni chónta ijie síin chjasintajni la tihin ti nkehe nixja sin xrich'ia sin. <sup>6</sup>Andá jeheni la xjeen Díos la kaín ti nkexro chóxin Díos la tihin sin ti nkehe chrónkani. Andá ti nkexro jehya kuènté Díos mé tjinkakohñña sin tsihin sin ti nkehe chrónkani. Mé xíkaha tónoexíni nkexro ti chaxín chónta Nchakuén Díos la ko ti nkexro chónta nchakuén ti jínahña xrich'ia.

#### Díos mé tjehe ti jeheni

<sup>7</sup>Kíchóni, chrótjehe ni kíchóni, kixin ti tjehe ni kíchóni la tixín ti itjen Díos. Kaín ti nkexro tjehe kicho mé xjeen Díos, la ko chóxin Díos. <sup>8</sup>Ti nkexro tjeheya kicho, la chóxinhña Díos kixin Díos la tjehe chojni. <sup>9</sup>Díos la ó kjuakoxin kixin chaxín tjehe

ti jeheni kixin ichr'án ch'an ti nkokoxón Xjeen ch'an ntihi chjasintajni kixin tsochóntaxíni ti kjuachón nkochríxín ti tsitekaoni ti xjeen ch'an. <sup>10</sup>Ti tjehe ni Díos la mé xíkhi: jehya jeheni kótjehe ni Díos sao. Náhi. Díos mé sao kotjehe ti jeheni, la ichr'án ch'an ti xjeen ch'an k'uenyákohen ti jeheni kixin tsotjuáxin ti ijie chóntani.

<sup>11</sup>Méxra, kíchóni, Díos la ó kjuakoxin kixin imá tjehe ti jeheni, la kjaxin jeheni chrótjehe ni kíchóni kaín aséni. <sup>12</sup>\*Díos la ninkexró k'uíkonhña. Andá ti jeheni tjehe ni kíchóni la Díos tjejókoni, ndá tsjinkitsa ch'an kixin chaxín tsotjehe ni kíchóni. <sup>13</sup>¿Xá nkexrín tsoñoexíni kixin tjejókoni Díos la ko jehe ch'an itjen ch'an ti tjejóni? Kixin jehe ch'an la kjuajon ch'an ti Nchakuén ch'an chóntani. <sup>14</sup>Andá jeheni la k'uíkoni la ko chrónkani kixin It'éni Díos ichr'án ch'an ti Xjeen ch'an kixin tsaáxin kaín ti chojni síin chjasintajni. <sup>15</sup>Kaín ti nkexro tsitekaon kixin Jesús mé Xjeen Díos la tjeko Díos la ko Díos itjen ti tjejó sin.

<sup>16</sup>Ndá xíkaha noheni la ko titekaoni kixin Díos la tjehe ti jeheni. Díos la nkochríxín tjehe chojni, la kaín ti nkexro tjehe kicho la tjejóko sin Díos la ko Díos tjeko ti jehe sin.

<sup>17</sup>Ndá xíkaha jeheni, ti chaxín

tjueheni kichóni la ko tjueheni Díos, la ti ó itsi ti ñao tsjixixín la tsochrahonhñani kixin k'uejoni ntihi chjasintajni éxi kjuák'e Ìnchéni Jesucristo la ti xikaha la kohya ninkehó kjuachrakon. <sup>18</sup>Ti chaxín tjueheni Díos la kohya ninkehó kjuachrakon. Ti tjueheni Díos la tíha tsakítsje kaín ti kjuachrakon, kixin ti kjuachrakon la tjasótexín chojni. Méxra ti nkojín chojni chrakon la chaxínhña kaín asén tjuehe Díos.

<sup>19</sup>Jeheni la tjueheni kichóni la ko Díos kixin sao Díos kjuakoxin kixin tjuehe ti jeheni. <sup>20</sup>Ti nkojín nkexro ndáchro: “Janhan la tjuahá Díos”, andá naxá nínkakohen ti kicho, mé tíha la ijnko chojni ch'ia. Kixin ti nkexro tjuehya ti kicho kjónté t'ikon, la nkexrín chrótjuehé sin Díos ti nunca k'ufkonhña sin. <sup>21</sup>La Ìnchéni Jesucristo k'uetōan kixin ti nkexro tjuehe Díos la kjaxin chrótjuehé sin kicho sin.

#### Ti titekaoni Díos la tsjachahya ti chjasintajni

**5** <sup>1</sup>Kaín ti nkexro titekaon kixin Jesús mé ti Cristo, la jehe sin mé xjeen Díos; la kaín ti nkexro tjuehe ti it'é ch'an mé kjaxin tjuehe ti xjeen Díos. <sup>2</sup>Andá xikaha ti tjueheni Díos la ko nchexiteyáni ti nkehe k'uetōan ch'an, la noheni kixin kjaxin tjueheni ti nkexro k'óna

xjeen ch'an. <sup>3</sup>\*Ti tjueheni Díos la ticháxin sinchexiteyáni ti nkehe k'uetōan ch'an, andá ti nkehe k'uetōan ch'an la jehya ijnko nkehe imá ixra. <sup>4</sup>Kixin kaín ti nkexro k'óna xjeen Díos la tsjacha sin kixin tsjachrèhya ti nkehe kuènté chjasintajni ti jehe sin. Ti tinkáchónkini Ìnchéni mé tsjachani kixin tsjachrèhya ti jeheni ti nkehe kuènté chjasintajni. <sup>5</sup>¿Xá nkexro tsjacha tsítóhe ti nkehe kuènté chjasintajni, á jehya ti nkexro chaxín titekaon kixin Jesús mé Xjeen Díos ní?

#### Ti nkehe chrónkaxín nchakuén Díos

<sup>6</sup>Ti ó ikui Ìnchéni Jesucristo la kuikitexín ch'an ìntà la ti ó ik'uén ch'an la k'uitjí ti ijnié ch'an. Andá ti nchakuén Díos mé chronka tíhi la kaín ti nkehe chronka ti nchakuén ch'an la chaxín ndoa. <sup>7</sup>Nkaya nkajní la iní nkexro tsochronka kixin chaxín tíhi: It'éni Díos, ti itan, la ko ti Nchakuén Díos, la ti iní sin la nkoqoa nkexro tíha. <sup>8</sup>La iní sin mé chronka ntihi chjasintajni kixin chaxín tíha: ti Nchakuén Díos, ti ìntà la ko ti ijni; iní tíhi mé nokón chronka. <sup>9</sup>Titekaoni ti nkehe chronka chojni, kjánchó antsí tjetōan ti nkehe chronka Díos, kixin tíha la chaxín Díos chrónka nkexrín itjen ti Xjeen ch'an. <sup>10</sup>Ti nkexro titekaon ti

Xjeen Díos la titekaon sin ti nkehe chrónka ch'an. Andá ti nkexro titekakonhña Díos, la ch'éna sin Díos éxi ijnko nkexro ch'ia, kixin titekakonhña sin ti nkehe chrónka Díos kuènté ti Xjeen ch'an. <sup>11</sup>\*Andá tíhi ti nkehe chrónka Díos kixin tsajon ch'an ti kjuachón nkochrín, andá ti kjuachón mé chóna ti Xjeen ch'an. <sup>12</sup>Ti nkexro chóna ti Xjeen Díos mé chóna ti kjuachón; andá ti nkexro chónahya ti Xjeen Díos la chónahya ti kjuachón.

**Chrónkaxín ch'an  
kuènté ti kjuachón**

<sup>13</sup>Kjinhara tíhi kixin tsitekáonra ti Xjeen Díos, kixin tsonohara kixin chontara ti kjuachón nkochrín.

<sup>14</sup>Tíhi chóxixíni Díos kixin ti nkehe tjancheheni ch'an éxi tjinkaon ch'an, la jehe ch'an tjetihin ch'an. <sup>15</sup>Andá ti chaxín noheni kixin Díos la tihin ti nixjeheni ch'an, la kjaxin noheni kixin chótani ti nkehe kjuanchiani.

<sup>16</sup>Ti nkojinra, ts'ikonra kixin ijnko kichóni tjasin ijie jehya

chrók'uenxín ch'an, la nixjehéra Díos kixin tsochjéhe ch'an kjuachón ti kichóni a. Chaxín siín ijie ts'enxín chojni, la tíha la tjáncháhya kixin chrónixjehéra Díos kixin ti nkexro a. <sup>17</sup>Kaín ti nkehe jínahña tjenkayáxin chojni la ijie tíha, kjánchó jehya kaín ijie ts'enxín chojni.

<sup>18</sup>Noheni kixin ti nkexro titekaon Díos la í tjenkayáxinhña ti nkehe nduáhya, kixin ti Xjeen Díos, Jesucristo, la tsjinkitsa ti jehe sin, la ti Jínahña la í tsjachahya tsjachrè ti jehe sin.

<sup>19</sup>Kjaxin noheni kixin ó k'ónani xjeen Díos, la kaín ti chojni siín chjasintajni la ti Jínahña t'etuehen.

<sup>20</sup>La noheni kixin ti Xjeen Díos la ikui chjasintajni, la nchenohe ti jeheni nkexrín tsochóxini ti Díos chaxín. La ijie tjejókoni ti nkexro chaxín, ti xjeen ch'an, Jesucristo. Mé tíha ti Díos chaxín la ko ti kjuachón nkochrín. <sup>21</sup>Xjeeni, tinkachónkihyara ti nkehe tsíkjanõña, la xráxinkaonra ti Díos chaxín. Mé xíkaha tsohen. Ó tjen.